

Pisortat ataatsimoortumik allaffisornerisa aaqqissugaanerannut atatillugu naliliinissamut ataatsimiitaliarsuarmik pilersitsisoqarnissaanut Naalakkersuisut peqquneqarnissaannut Inatsisartut aalajangiiffigisassaattut siunnersuut. Maanna suliassaasut aallaavigalugit allaffisornerup annertussusaa ataatsimiitaliarsuup nalilersussavaa, suleriaatsit sunniuteqarluarnerusut pilersinnissaannut immikkoortortaqarfiillu suliassaqarfiillu (sektorit) akimorlugit suleqatigiinnerup pitsangorsaaviginissaanut periarfissat misissussallugit, kiisalu allatut aaqqissuussinissamut periarfissanik siunnersuuteqarluni. Siunnersuutini tamani inatsisit ingerlatsinermut tunngasut qasukkartinneqannginnissaat aallaaviussaaq. Ataatsimiitaliarsuaq inunnit sektorinit assigiinngitsuneersunit inuttaqassaaq, tassa pisortat sektoriineersut aamma namminersortut sektoriineersut ilaasortat misilittagaqartut amerlaqatigiissallutik. Ataatsimiitaliarsuaq assigiinngissitaartuneersunit ilaliussanik sulisitaqassaaq, sulininilu ukiut marluk iluanni naammassisssallugu. Tamatuma kingorna ataatsimiitaliarsuup innersuussutai Inatsisartuni politikkikkut suliarineqassapput. (UKA2019/43)

(Inatsisartunut ilaasortaq Peter Olsen, Inuit Ataqatigiiit)

Immikkoortuni Namminersorlutik Oqartussat kommunillu akuuffigisaanni marloqiusamik allaffiosornerup pinngitsoortinnejarnissaanut, ataatsimut suleriaatsit pisariillisarnissaannut isumalluutillu avitseqatigiissutigineqarnissaannut periarfissat qulaajaaffagalugit Naalakkersuisut nassuaammik UKA2021-mut saqqummiussinissamik peqquneqarnissaannik Inatsisartut aalajangiiffigisassaatut siunnersuut. (UKA2019/103)

(Inatsisartunut ilaasortaq Tillie Martinussen, Suleqatigiissitsisut)

Akissuteqaat

(Naalakkersuisut Siulittaasuat)

Siullermeerneqarnera

Inatsisartunut ilaasortaq aalajangiiffigisassatut siunnersuuteqarnerannut Naalakkersuisut qutsavigaat. Pisortat allaffisornerannik naleqqussaanissamut, sunniuteqarluarnerulersitsinissamut eqaannerulersitsinissamullu siunnersummik saqqummiussisoqarsinnaanissa siunertalaralugu, pisortani allaffisornerup qulaajaavagineqarnissa naliliiffigineqarnissaalu, siunnersuutini marluusuni taakkunani siunnerfigineqarpoq.

Pisortat suliassaqarfiiini sunniuteqarnerulersitsinissaq Naalakkersuisut pingaartitorujussuuat. Tamanna ilaatigut 2019-imut aningaasanut inatsit pillugu isumaqatigiissummi kiisalu 2019-

imut Aningaasaqarnikkut ingerlatsineq pillugu Nalunaarusiammi aalajangersimasumik oqaatigineqarpoq.

Aammami pissusiviusuni aalajangiussinissaq imaluunniit aalajangiussinnginnissaq akueriinnarsinnaanngilarput. Ukiuni aggersuni ikittuinnaat amerlanerujartuinnartunik pilersuisussaallutik, aningaasartuuteqarnerup annertusiartuinnarnera pissutigalugu, tamanna pisariaqarpoq. Taamaattumik pisortat suliassaqarfii nutarterinissaq aamma Napatitsinermut Siuariartornissamullu Pilersaarusiami iluarsaaqqinnermi aqqtissat pingarnerit pingasut, pisortat missingersuutaanni oqimaaqatigiissitsilernissamut iluaqtaasussat, ilagaat.

Tamanna tunngavigalugu ilaatigut Namminersorlutik Oqartussat aamma kommunit ataatsimoorussamik ERP-mi periaatsimik ineriartortitsinerannut, sulisoqarnermut suliassaqarfimmi, ilinniartitaanermut suliassaqarfimmi, avataaneersunik siunnersortinik atuinermut, pisortat ataatsimoorussamik pisiniartarnerannut aningaasartuutinik misisueqqissaarneq maannakkorpiaq suliarineqarpoq, tamannalu suliniutaavoq pingartinneqartoq.

Peqatigisaanik ilaatigut pisortat suliassaqarfii akimorlugit paasisassat sammillugit ataqtigiissaarluakkamik naleqqussagaasumillu pilersaarusiornissap qulakkeerneqarnissaa siunertaralugu, suliassaqarfinni assigiinngitsuni taakkunani immikkoortumut pilersaarutit suliarineqarput.

Marloqiusamik allaffisornerup annikinnerulersinnissa aammalu Naalakkersuisut aamma kommunit akornanni suleqatigiinnerup eqaannerulersinnissa siunertaralugit, kommuninut tunngatillugu tapiissutinut utertitsisarnermullu aaqqissuussinerit naleqqussarneqarnissaannut periarfissat qulaajaavagineqarnissaat, 2020-mut kommuninut ataatsimoortumik tapiissutit pillugit oqaloqatigiinnerni ingerlasuni aamma qulequtaasimavoq pingaruteqartoq.

Naalakkersuisut taamaalillutik aalajangiiffigisassatut siunnersuutit marluusut taakkua, suliniutinut Naalakkersuisuni aallartinneqareersunut naapertuuttutut isigaat, taamaalillutillu siunnersuutit suliaqarnerup sunniuteqarluarnerulersitsinissaq aammalu angusaqarnissap aallunneqarnissa siunertaralugit Naalakkersuisut aallartissimasaasa, iluanniippuit.

Suliaqarnissat aalajangiiffigisassatut siunnersuutini UKA2019/43-imi nassuiarneqartut ilai maannakkorpiaq aallartinneqareermata, ataatsimiititaliarsuarmik, suliassaqarfinnik Namminersorlutik Oqartussanit kommuninilu sammineqareersunik samminnittussamik pilersitsinissaq naleqquutissasoq, Naalakkersuisut isumaqanngillat. UKA2021-imut UKA2019/103-imi taaneqartutut ataatsimoortumik nassuiaasiorneq Naalakkersuisut isumaat malillugu sunniuteqarluarnerulersitsinissamut suliaqarnissamut siuarsaataasussaanngilaq.

Siunnersuutinut marluusunut tunngatillugu, ataatsimiititaliarsuup suliniuteqarneri ingerlareersuni aallaqqaataaniit aallartittussaanerata malitsigisaanik, tamanna tunngaviusumik

marloqiusamik allaffissornermik kinguneqassaaq aammalu nassuiaat suliassaqarfinnut
ingerlanneqareersunut tunngassuteqassalluni.

Taamatut oqaaseqarlutik Naalakkersuisut aalajangiiffisassatut siunnersuutit
itigartinneqassasut inassutigaat.